

Onajonim

Onajonim,
Ko‘zlaringizda
Running nafaslari bor edi,
Onajonim, yuzlaringizga
Oyning havaslari bor edi.
Onajonim, siz bilan jahon
Behigulday iforli edi.
Tunlar oydin, kunlar shodmon,
Shabadalar dutorli edi.
Tushlaringa kirib chiqasiz,
Sochlarimni o‘rib chiqasiz.
Farishtaday boshim uzra goh
Oromimni qo‘rib chiqasiz.
Talpinaman, quchsaydim qani?
Sog‘inchlardan qochsaydim qani?
Ko‘z yoshlarim gulga aylansa,
Poyingizga sochsaydim qani?
Onajonim!
Jonajonim!

**Gulxan jurnalidan
Oydin Hojiyeva
O‘zbekiston xalq shoirasi.**

Ildam bola

Ildam bola, tishi kemshik,
Kattalarday aqlli,
Tagidagi qari eshak
Qistatadi jahlini.
O‘zi-ku xo‘p ildam, daydi,
Chopsa o‘zar shamoldan.
Ammo eshagi yurmaydi,
Boshi qotgan bu holdan.
Kuyinmagil, hoy bolakay —
O‘zni urib, shoshqinib.
Sen chalganda sayroqi nay —
Toshar ko‘klam toshqini.
Bosh ustingda tandir misol —
Qizimaydi cho‘l ko‘ki,
Shaharlarni qilarsan lol,
Odam bo‘lib, sen o‘qib.
Horgan chog‘i, qo‘y, olsin dam,
Shunda qolsin eshaging.
Men yolingga lolalardan
Qizg‘ish gilam to‘shadim.
Dunyo kezar hali sening
Temir oyoqchalaring...

Gulxan jurnalidan
Halima Xudoyberdiyeva
O‘zbekiston xalq shoirasi.